

四庫全書

集部

欽定四庫全書

集部

陳剛中詩集卷二

詳校官中書臣 羅錦森

侍讀臣 孫球覆勘

總校官檢討臣 何思鈞

校對官中書臣 蔡廷衡

謄錄監生臣 杜羣玉

欽定四庫全書

集部五

陳剛中詩集

別集類四元

提要

臣等謹案陳剛中詩集三卷附錄一卷元陳孚撰孚字剛中天台臨海人歷官奉直大夫台州路總管府治中事蹟具元史本傳此集卷一題曰觀光稿乃至元中孚以布衣上一統賦江浙行省聞於朝署上蔡書院山長

考滿謁選京師時所作卷二題曰交州稿時
至元二十九年世祖命梁曾以吏部尚書再
使安南孚以翰林國史院編修官攝禮部郎
中為副使往來道中所作卷三題曰玉堂稿
皆孚官翰林日作案孚使安南回擢翰林待
制仍兼國史院編修而稿中有翰苑薦為應
奉文字二十韻謝大司徒併呈諸學士一首
又有至元壬辰呈翰林請補外二首壬辰即

使還之次年是前後官翰林所作均在此集也觀光交州二稿皆紀道路所經山川古跡盖仿范成大使北諸詩而大致亦復相埒玉堂稿多舂容諧雅泯泯乎治世之音其上都紀行之作與前二稿工力相敵盖摹繪土風最所留意矣附錄一卷皆載諭安南詔安南謝罪表及孚與安南諸書考孚元書無傳其出使始末乃載梁曾傳中其時陳世燻不出

郊迎又不延使自陽明中門入孚作三書責
之辭直氣壯迄不辱命然傳不載其書詞此
卷亦足補史闕也瞿宗吉歸田詩話曰鸚鵡
洲有陳剛中一篇詞語跌宕議論老成誠佳
作也又白門詩亦佳葉盛水東日記則曰詩
與文稍異者以詩兼興趣有感慨調笑風流
脫洒處如長詩落句翻空旁入作散場語是
也然時一出奇耳前元詩人陳孚剛中集中

歌行則全用此體觀者察之云云蓋宗吉舉
其一兩篇而盛則核其全集故以自落窠臼
為病雖推闡少苛要亦識微之論矣又陶宗
儀輟耕錄記孚少嘗為僧題詩於父執之壁
父執知其欲歸俗因使養髮妻之以女其詩
淺鄙其事亦不知有無小說多誣不盡可信
集中不載顧嗣立元詩選初集乃錄之補遺
中殊失別擇今無取焉乾隆四十六年十月

恭校上

總纂官

臣紀昀

臣陸錫熊

臣孫士毅

總校官

臣陸

費

擘

欽定四庫全書

陳剛中詩集卷一

元 陳孚 撰

觀光藁

出門別親友

停君漢水浮鴨之翠杓聽我嶧山栖鸞之綠桐男兒拂
衣出門去龍泉三尺光如虹君不見磻溪鶴髮釣魚者
偶擲漁竿來牧野白旄麾開炮烙烟桓圭朱芾侯青社

又不見南陽臥龍人不識一朝佐漢坐狼石羽扇輕搖
蛇鳥驚火精焰焰天西極旗亭四月柳如藍紫駟嘶風
黃金駮豈無叩牛歌亦有捫蝨談天生巉巖萃律骨蒿
萊槁死誰能甘我欲登泰山扶筇歎天關東溟若木如
可攀手弄日月青雲間我欲渡黃河赤脚凌秋波水仙樓
閣銀嵯峩徑叱海若笞蛟鼉停君翠杓聽我綠桐真人
開天六合同風騶虞鳳凰飛舞鎬宮有線五色獻于重
瞳補舜衣裳山龍華蟲虎豹九關兮不可以達吾則脫

冠歸來兮丹丘之青峯長揖二三子目送西征鴻

拜辭先隴而行

晨陟馬鬣封血淚如雨滴父兮曩即世宿草十改碧平生熊豹姿虬髯身七尺豈無千里心柰此驥伏櫪家有
三萬卷手自校朱墨親傳不肖孤今亦字僅識名未成
父志何以慰窀穸墓下當自誓素操堅鐵石

過鏡湖

鏡水八百里水光如鏡明偶尋古寺坐便有清風生天

澗雁一點山空猿數聲老僧作茗供笑下孤舟輕

越上早行

青鞋三十里草露惹衣斑潮落曹娥渡雲昏夏禹山秋
聲黃葉裏天影白鷗間欲問錢塘路漁家半掩關

夜泊六和塔下

碧天如幕垂露濕星磊磊漁燈射寒沙萬點亂光彩壯
哉大江水浩浩東北匯西風捲潮來鐵馬擁萬鎧木落
烟嶂橫鷓鴣魂安在臥聞黃帽郎一曲歌欸乃扣舷起

和之逸興渺雲海

鳳凰山

浮屠百尺聳亭亭落日鴉啼野蔓青故國盡銷熊虎氣
荒山空帶鳳凰形金根輦路迎禪駕玉樹歌臺語梵鈴
惟有錢塘江上月年年隨雁過寒汀

湖上感舊

昔日珠樓擁翠鈿女牆猶在草芊芊東風第六橋邊柳
不見黃鸝見杜鵑

和靖墓

北邙翁仲拱朱門
玉椀時驚古帝魂
誰似孤山一杯土
梅花依舊月黃昏

葛嶺行

葛嶺相君之故居
昔年甲第臨通衢
錢橫花間甃作徑
錦鋪泉底流為渠
後庭三千傾城姝
歌舞絕世冰肌膚
麒麟銀裳龍綃裾
佩以文螺木難珠
相君出擁萬虎士
各操關戟左右趨
劔履上殿帝賜坐
駘蹄七寶分御廚

望塵拜者頌元老伊尹周公所不如豈知一旦事瓦裂
銀鐺鐵鑠載以驢我偶過此訪廢址狐兔縱橫草焦枯
琨臺瑤砌不復見已有野人來種蔬却怪當時鑿隧道
挾詐出入潛如狙大臣一身佩天下版牆複壁何謬歟
山童從我一壺酒回首落日悲歎獻摩挲仆碑共踞坐
尚是御賜凌烟圖

飛來峯

寒峯插天出玲瓏萬菑萑微風起松際怪石勢搖撼上

有百尺松幽花綴紅糝野猿忽躍去滴下露千點回首
冷泉亭天鏡光澈澈游姬長眉青嬌童兩髦髻平生山水
癖如人嗜昌歎對此一壺酒玉色翻醉臉路逢老祝髮
絳袍金光閃茲山信自佳恨為緇塵染置之且復醉天
竺鼓統統

嘉興

有顧野王
讀書堆

燕子穿烟水荇開故家猶有讀書堆平生雙耳松風裏
又向華亭聽鶴來

簫鼓聲中十萬家
垂楊淺映綠牕紗
象梳兩兩蟬鬟女
笑擁紅橋買藕花

平江

滄浪亭下望姑蘇
千尺飛橋接太湖
故里空傳吳稻蟹
寒祠猶記晉蓴鱸
芙蓉夜月開天鏡
楊柳春風擁畫圖
為問館娃歌舞處
鶯花還似昔年無

吳宮子夜歌

紫貝樓闕鬱金香
暖雲七十紅鴛鴦
玉蟬笑擁霞綃裳

星河不墮宮點長綠樽灑灑麟髓泣露重花寒秋不濕
飲歌一聲驚怒濤海鯨夾陛如人立誰知淺顰蛾半掃
中有疎螢滿愁沼越兵曉跨西風來碧波一夜芙蓉老

吳松江長橋

松江波萬頃橋倚碧雲端白鳥穿屏小青天落鏡寒夕
陽明佛塔秋色老漁竿無限凭闌意何時此掛冠

三高祠

君不見洛陽記室雙鬢皤不忍荆棘埋銅駝西風忽念

鱸魚鱠歸來江上眠秋波又不見甫里先生心更苦河
朔生靈半黃土夕陽蓑笠二頃田口誦羲黃思太古二
君隱淪豈得已一生不及鴟夷子吳宮鹿走越山高脫
纓徑濯滄浪水丈夫此身繫乾坤豈甘使老菰蒲根古今
得失一卮酒我欲起酌汀鷗魂

常州

毘陵城西漁火紅家家夜香燒碧空荻花離離李子塚
楓葉索索春申宮雞聲人語三十里大船小船浪相倚

鷓鴣一雙飛上天人在舵樓弄秋水

京口

昔日巍樓倚北門朱闌空鎖蒼苔痕金山風起水聲急
鐵甕雨來雲氣昏仙杖無靈花已槁霸圖有恨石猶存
漁舟只在滄浪上一笛夕陽愁客魂

登北固樓

北固間回首荒城夕照中烟光浮海濶天影入樓空星
斗占吳分江河見禹功誰家兩翁仲無語立秋風

金山寺

萬頃天光俯可吞，壺中別有小乾坤。
雲移塔影橫江口，潮送鐘聲過海門。
僧榻夜隨蛟室湧，佛燈秋隔蜃樓昏。
年年只有中泠水，不受人間一點塵。

瓜洲

烟際繫孤舟，蘆花滿棹秋。
江空雙雁落，天濶一星流。
急鼓西津渡，殘燈北固樓。
商人茅店下，沽酒話揚州。

真州

淮海三千里天開錦繡鄉
烟濃楊柳重風淡芰荷香
翠戶妝營妓紅橋稅海商
黃昏燈火鬧塵麝撲衣裳

金陵

六代帝王州寒烟滿石頭
星河天北轉江漢水東流
步絕金蓮雨歌殘玉樹秋
白頭有漁者猶說景陽樓

鳳凰臺

鳳凰臺上野烏啼笳鼓連營日
又西天地無情潮寂寞
英雄有恨黍高低殘柝夜雨迷
朱雀荒塚秋風怨白雞

空有斷碑蒼蘚裏
千年留得謫仙題

臙脂井

淚痕滴透綠苔香
回首宮中已夕陽
萬里山河天不管
只留一井屬君王

烏衣巷

鳩鵲金波事已非
江山何限淚沾衣
臺空鳳去無人問
只說尋常燕子飛

雨華臺

巍臺千尺梵王家雲淡秦淮月映沙天雨寶華今不見
空聞人唱後庭花

揚州

千載殘城生亂莎夕陽吹角秋風多吳公臺下已黃土
揚子橋頭空白波隔岸櫓聲桃葉渡滿樓燈影柳枝歌
當年杜牧亦何意空向珠簾醉綺羅

平山堂

堂上醉翁仙去蘆花雪滿汀洲二十四橋烟水為誰流

下揚州

后土祠瓊花

荒棘萋萋后土宮芳根已逐綵雲空
男兒別有揚州淚不為瓊花滴曉風

露筋廟

白鳥飛空萬箭攢玉肌一夜粉痕乾
殘碑何用誇筋露要露平生鐵肺肝

高郵軍

吳通上國已千秋日日長淮送客舟一卷麟經孤燭下
夜深無語過邗溝

文星已逐水西沉對客揮毫只此心今夜又遊臺上月
不堪更照古藤陰

萬頃波間寶氣浮晚來醜酒酌中流天明更欲凭闌望
說與驪龍莫暗投

甓社湖遇大風

舊傳有夜
光之珠

天低烟冥冥平湖遠淮楚一帆東南來乃為風伯侮前

如殘葉飄後如輕蝶舞驚濤湧雪山濕浪濺銀雨嘗聞
貝宮胎夜夜靈光吐吾無盜睡心龍兮爾何怒舟師倚
斷桅相戒不得語亦有誦咒者拱手面如土回視天際
雁萬點落遠浦彼物何悠悠吾生浪自苦

寶應縣

關河魚沸血波流喜見元符下楚州宮壺明年翬翟掩
為誰留得採桑鉤

淮安州

古淮陰郡

孤帆下江北千里西風輕泊舟公路浦始見南昌亭青
天下白露亂葉淒以聲汀洲結海色冉冉孤月生殘鴉
感興廢斷腸悲飄零安得攜美酒臺上呼劉伶百年一
箕踞六合皆螟蛉

長淮有感

一笛山陽上東風蜃氣腥烟迷隋帝柳潮湧楚王萍曉
市堆淮白秋郊獵海青古今愁不盡落日蓼花汀

淮陰侯廟

漢家羅網政高張誰有勲名紀太常戲爾築壇呼大將
危乎操印立真王烟中草木疑殘幟沙上風濤憶故囊
鐘室千年君莫怨未央宮殿已斜陽

漂母塚

英雄未遇亦堪羞一飯區區不自謀莫笑千金酬漂母
漢家更有頡羹侯

黃河謠

長淮綠如苔飛下桐栢山黃河忽西來亂瀉長淮間馮

夷鼓狂浪崢嶸雪崖墮驚起無支祁腥涎沃鐵鎖兩雄
鬪不死大聲吼乾坤震撼山嶽骨磨蕩日月魂黃河無
停時淮亦流不息東風吹海波萬里湧秋色秋色不可
掃青烟映蘆花白鳥亦四五長鳴下汀沙黃靈奠四瀆
各剖盤古髓千載今合流神理胡乃爾漁翁一鬢霜扁
舟依古樹隔浦欲扣之翩然凌波去

清河口

百年南北戰塵昏只指長淮作塞垣今日清河河上水

天教洗眼看中原

邳州

沂水碧潺潺汀沙白鳥間
林邊郊子國烟際嶧陽山
茅屋秋先破荒城夜不關
烹魚呼濁酒一笑夕陽間

圮橋

履印青苔跡未消
一編徑佐聖明朝
祖龍流毒如洪水
濟盡生靈是此橋

白門

邳之城南門呂布為
老瞞圍急登此請降

布死城南未足悲老瞞可是算無遺不知別有三分者
只在當時大耳兒

古宿遷

唐宿
豫縣

淮水東流古宿遷荒郊千里絕人烟征衣不脫夜無寐
舟在西風亂荻邊

月落孤鳴野草黃雁飛無數水茫茫數星鬼火寒沙上
知是何年舊戰場

呂梁洪

沂泗之水來魯邦平沙千里流淙淙忽逢呂梁萬石硤
勢與石鬪不肯降半天捲起千尺瀧怒聲日夜相搏撞
有如萬騎騰驪驪左挾賁獲右昇逢惡若哮虎鼎可扛
踴樂躍矢橫矛鏃風雲蛇鳥萬旌幢大呼擊碎龍文杠
死戰不復留空控我生事業在北牕蒙莊一卷暎秋缸
每羨老叟何其蠢忠信出入言非詭及此更覺心忼忼
西風吹衣衣茸茆店沽來酒盈缸篤人贈我尺鯉雙
扣舷而歌和柁控問禹何故留此洛何當理我小舩艘

東浮溟海西岷江沛然一口吸老龐要使后土安鴻龐

徐州

項羽戲馬臺

項王熊豹姿氣欲吞天下大呼渡河來山嶽如崩瓦當
其火秦宮血湧渭水赭噴目叱諸侯膽落毛髮洒誰知
陰陵路浩歌淚如瀉惟徐乃故都昔此奠宗社尚想巖
臺上鐵梁擁萬馬酒酣笳鼓鳴旌旗蔽原野及今亦何
有荒棘秋滿把皇天祚真主神器不可假豈有時雨師
刈人如土苴天亡君勿悲為君奠壘竿

黃樓

東坡
所築

長河如帶彭城東亂石蹴起百步洪昔年民歌山鞠藭
孤城匯為河伯宮城上閃閃鯨鬣紅雪堂先生人中龍
驚湍偃受丸泥封手援赤子魚腹中黃樓千尺雉堞雄
巍梁畫棟光矐矐吹笙伐鼓撞歌鐘先生鏗然一枝筇
麾斥八極凌星虹酒酣叱起楚重瞳為我拔劍舞西風
邛君作賦聲摩空至今讀者毛髮鬆百年事往猶飛鴻
我獨流涕將何從孤角一聲烟濛濛又送落日沉西峯

百步洪

大山如飛虬小山如伏牛
天河橫空來聲撼山骨浮
我偶石上眠夢驚霹靂怒
急起扶瘦筇恐山亦流去

范增墓

七十衰翁兩鬢霜西來一笑
火咸陽平生奇計無他事
只勸鴻門殺漢王

泗水

落日漁歌何處白鷗雙
墮蒼烟欲弔周家殘鼎
秋風泗

水千年

燕子樓

唐張建封妾盼盼之居也
哀其節作長相思兩章

長相思久別離東風不暖殘燕支乳鴉困柔鸞悲櫻桃
泣紅膩靡蕪凋綠滋牙床琥珀枕夢君君不知

長相思久離別珠樓無人但有月翠屏寒銀燭歇芙蓉
為誰憐丁香空自結淚滴錦檐榆十年化為血

出彭城北門

千戴金湯拱上流只今惟有荻花秋江南客子笑無語

閒看黃河下汴州

留侯廟

子房王佐才其風凜冰雪天遣鶴髮翁圯上授寶訣博
浪沙中千尺鐵祖龍未死膽已裂况此喑鳴扛鼎夫不
直秋風一劒血談笑帷幄間六合雄雌決卯金四百年
只在三寸舌但恨漢德非姚虞不得身為古稷契雍熙
至治如可作豈肯脫冠掛北闕留城古祠今千載碧蘚
溜雨眠斷碣我恐至人或不死尚有笙鶴擁玉節酌泉

採菊往奠之回首芒碭墮山月

沛縣歌風臺

沛宮一曲大風歌誰識尊前感慨多
拔木揚沙濰水上
大風中有漢山河

沛上風雲志未酬彭城先有錦衣遊
同為富貴歸鄉者
只是龍顏異沐猴

原廟衣冠久已灰斷碑無首臥蒼苔
至今風起雲飛夜
猶想帝魂思沛來

陵母墓

太傅勲名半紙殘
百年人子痛如山
緣何方寸非徐庶
忍死慈親一劍間

魯橋

濟州南
六十里

東魯三家市長橋
壓怒濤寒沙秋一雁
殘月夜千艘
址極天形大中原
地勢高百年洙泗上
今得浣征袍

夜泊濟河

十日淮沂上
今朝渡濟河
龜蒙秋燒濶
鳧嶧夕陽多
古

寺雲籠塔長亭柳暎波魯邦無孔子何處聽絃歌

題太白酒樓

昔聞李太白山東飲酒有酒樓今我登樓來北風吹髮
寒颼颼太白天酒仙人間不可留金光絳氣九萬里翩
然而上騎赤虬左蹴大江濤右翻黃河流手攀北斗招
搖柄瓊田倒瀉銀灣秋銀灣吸乾日月液蟾驚烏泣黃
姑愁太白方悠然掀髯送汀鷗炯如曉霞一點暎秋水
紅痕微湧玉色浮太虛變化如蜉蝣仙今何在不可求

惟有胸中燦爛五色錦化為元氣包神州我欲起仙從
之遊安得羽翮飛上崑崙丘

東平府

任宿須句國烟雲擁汶河長亭東接岱短棹北通阿萬
井樓臺壯千郊衍沃多無鹽城突兀司隸石嵯峩夜月
喧簫鼓春風扇綺羅鈿車香不掃步障錦相摩地尚雄
千乘人猶慕四科故侯敦學校俊士樂絃歌紫闥懸金
榜朱樓響玉珂自天沾湛露率土育菁莪衮冕明蟲藻

樽疊列象犧淹中書在否稷下事如何沂詠難逢點鄒
遷尚憶軻明朝燕趙去萬事付滄波

望泰山

扁舟浮泗來夜宿須句國眼明忽見玉芙蓉插天亭亭
千丈碧舟人為我言此乃七十二君之泰山天風吹落
黃峴露冰花亂灑龜蒙間七十二君今何在寶符朝朝
吐光彩千年老鶴巢雲松夜看白日湧東海東海青童
仙踞龜啖蟹螯笑秦亭上攀蟠桃笑彼鞭石駕長橋天

帝之孫莫天極鮑魚狂魄腥山色我有東封書中舍萬
古情欲奏天子甘泉殿手刻玉檢黃金繩寄聲為報牽
狗老先向石壇種瑤草

黃石公廟

在東阿縣
穀城南

穀城黃石廟古木白雲深黃石有存沒素書無古今老
聃三世夢孺子一生心日落祠門掩殘鴉又滿林

管仲井

在東
阿縣

畫野分民亂井田百王禮樂散寒烟平生一勺潢汙水

不信東溟浪沃天

聊城縣

七國兵戈若沸羹詩書誰問魯諸生君看一紙聊城箭
何似安平十萬兵

高唐州

千里齊郊亦壯哉扶筇城上獨徘徊馬隨濟岱秋風去
鴈帶關河夜月來驛路暎牆榆葉老漁村帶水荻花開
吳儂誤讀襄王傳空向山東夢楚臺

陵州

五里行盡桑麻疇十里一見蘋花洲十里五里烏鳥樂
隱隱烟火浮陵州陵州大船腹如鼓陵州梨棗賤如土
陵州女郎金縷衣低鬟亂擁紅牕舞柳衣裊裊縈清河
綠頭水禽飛帶波簫笙月下不肯飲一笑如此陵州何

景州

聊攝之東一千里昔為青社太公履只今但有無棣溝
榆葉亂擁沙水流車行半夜草露濕路傍土堠如人立

丁當鐸搖馬不驚黑天倒垂參昴星
吾生百年浪自苦
悲笳一聲殘月吐

廣川大夫廟

在景州北門

俯察人情仰憲天
素王心事策三篇
大夫不向江都死
換盡炎劉四百年

義利從來界限殊
大夫一語破昏愚
平生最笑秋風客
只愛黃金竈鬼書

阜城縣

唐帝失金鏡六合無光晶太微搖玉床影射攬搶星河
朔彈丸地梟獍接踵生乾犖肉未寒復有史思明鬼馬
載鬼妾氣薰草木腥天網何嘗漏瀆宮穿濕螢我闕過
逆壤驅車無留行安得踏東海飛戈膾長鯨

御莊

百年禮樂卯金刀忍把鴻名冠偽朝樹上一聲休也曲
路人猶自怨鷓鴣

獻州

萬里天東北西風獨杖藜雁聲秋帶魏樹色曉浮齊野
潤青烟淡天空白日低人家在何處隱隱野狐啼

河間府

北風河間道沙飛雲浩浩上有銜蘆不鳴之寒雁下有
隕霜半死之秋草城外平波青黛光大魚跳波一尺長
牧童吹笛楓葉裏疲牛倦馬眠夕陽有禽大如鶴紅喙
搖綠烟路人指我語似是信天緣我生功名付樽酒衣
如枯荷馬如狗為問天緣可信否旗亭擊劍寒蛟吼

君子館

牢落乾坤一腐儒
征岐半世泣楊朱
偶逢孤館呼君子
夜起挑燈讀古書

莫州

晨出莫州門
回望古易京
丹樓不復見
草白寒雉鳴
雉角角
棗纂纂
昔誰城
此公孫瓚
城南城北
陂水滿
寒蒲如劍
出水低
大火焚
巢天不
管野鳧
醉眠沙
土暖

吕仙翁廟

山形夭矯蒼精劍日影曛曛紫磨丹度盡世人人不識
午烟起處是邯鄲

雄州

燕南垂趙北際昔關義城鐵可礪城上烽火明如彗只
今殘堞黃雲曠老榆半枯懸薜荔市翁叱馬聲嘒嘒叩
以瓦橋潛出涕英雄虎鬪空萬世北風吹沙秋鶴唳

雄州白溝

遼宋兵戈事已休昔年曾此割神州一衣帶水殘陽外

猶有人言是白溝

涿州

晨發白溝河薄暮宿范陽殘城無雉堞枯木鳴白狼回
首望中原日落烟茫茫天低鷓沒處彷彿見太行緬懷
昭烈帝八尺鬚眉蒼平生漢社稷志欲為高光惜哉不
得就越在天一方里人亦何知牲酒奠樓桑車蓋不復
見但有秋草黃我來已千載誰復悲興亡天明登車去
塵霧沾衣裳

良鄉縣

過盡長亭又短亭
燕京初曉曉鐘聲
呼童拂拭青藜杖
早掛琴書上帝京

詠神京八景

太液秋風

一鏡拭開秋萬頃
碧天倒浸琉璃影
寒飈夜捲雪波去
貝闕珠宮黛光冷
三千櫂歌搖綠烟
濕鬟吹墮黃金蟬
琪樹颼颼紅鯉躍
袞龍正宴瑤池仙

瓊島春陰

一峯亭亭湧寒玉露花不墮
瑶草綠珠樓千尺星漢間
天飈吹下笙韶曲萬年枝上榭
葉滿小鸞振振遶龍管
金根曉御翠華來三十六宮碧雲暖

居庸疊翠

斷崖萬仞如削鐵鳥飛不度苔石裂
嵯岬枯木無碧柯
六月太陰飄急雪寒沙茫茫出關道
駱駝夜吼黃雲老
征鴻一聲起長空風吹草低山月小

盧溝曉月

長橋彎彎飲海鯨
河水不澱冰崢嶸
遠鷄數聲燈火杳
殘蟾酒映長庚橫
道上征車鐸聲急
霜花如錢馬鬣濕
忽驚沙際金影搖
白鷗飛下黃蘆立

西山晴雪

凍雀無聲庭檜響
冰花洒簷大如掌
平明起視巖壑間
挿天瓊瑤一千丈
夕陽微漏光嵯峨
倚欄闕爽氣多

雲間落葉有徑否
想見樵叟猶青蓑

薊門飛雨

黑雲如鴉漲川谷雷踴電躍風折木

闕

天萬

闕

海來

森森映牕如銀竹鳳城無數

闕

珠簾半捲西山秋

誰憐羈客家萬里一燈孤擁寒衾愁

玉泉垂虹

雪波碧湧千崖高落花點點浮寒瑤日斜忽奮五彩氣
飛上太空橫作橋古寺鐘殘塔鈴語回首前村猶急雨
輕綃欲剪一幅秋又逐西風過南浦

金臺夕照

魏坡十二青雲梯老樹偃伏猶躬圭長裾已翳星辰去
殘陽空掛盧溝西召南六百年宗社一日黃金重天下
精纏寶氣夜不收又見殘霞明朔野

陳剛中詩集卷一

欽定四庫全書

陳剛中詩集卷二

元 陳孚 撰

交州藁

出順承門

又騎官馬過中原袖有芝泥御墨痕
嶺海孤臣天咫尺
五雲回首是都門

過盧溝橋

去天尺五禁城西華表亭亭柳拂堤海上飛來雙蝶竦
雲間擁出萬狻猊太行山色浮鯨浪上國秋聲送馬蹄
誰識太微天極象迢迢河漢玉繩低

良鄉縣早行

西風黃葉館曉起候鐘聲驛吏張燈送山童抱褥行短
筇秋萬里長劔月三更猶有釣天夢依稀遶禁城

涿州

乾坤萬里一征驂馬上彎弓膽氣酣回首太行青未了

不知身在涿州南

樓桑廟

古廟千年後桑陰滿涿州
亂山空北向大火已西流
遺恨三分國英風百尺樓
里人牲酒莫想像袞龍浮

易州

白雁飛殘水滿洲
驛亭疎雨古槐秋
平生最惡荆軻事
手障西風過易州

保定府

聖明恩重一身輕
英蕩熒煌萬里行
試問黃金臺上月
清光此夜為誰明

萬點寒鴉噪野烟
保州城上夕陽天
道傍苔碣麒麟臥
知是誰家舊墓田

中山府

馬上秋雲擁節旄
霜花如雪點征袍
要留醒眼看天地
不向山中飲濁醪

定武蘭亭墮渺茫
愚儒猶護篋中藏
我來一笑無他語

獨立西風看雁行

真定懷古

千里桑麻綠蔭城萬家燈火管絃清恒山北走見雲氣
滹水西來聞雁聲主父故宮秋草合尉陀荒塚暮烟平
開元寺下青苔石猶有當時舊姓名

過滹沱河

鉦鼓連天戰血紅存亡只寄寸冰中憑誰剪取鱗鱗碧
畫作雲臺第一功

宿趙州驛

晉家曲沃舊池臺無數行人去又來可惜石橋三百尺
只留驢跡印青苔

攬轡樂城又趙州清霜點入鬢邊秋何如東院老尊宿
不出山門到白頭

望臺

北道將軍鐵鑱開火旗萬陣渡河來君臣感會風雲際
半在雲臺半望臺

鄱南光武廟

赤伏真天子玄圭袞藻明
千年高邑廟一笑下江兵
野闊騰龍氣河流渡馬聲
列侯冠劍合英采儼如生

過臨洺驛大雨雪寒甚

弭節發襄國飲馬清洺水
山岳忽陰沍急雪白玼玼
玼風利如刀剪剪射雙耳
飢鳥時一鳴僕夫寒墮指
人生三間茅豈不願鄉里
天子命有行去去何敢已
道傍有旗亭濕烟亂汀葦
尚想布衾人晏眠猶未起

邯鄲懷古

數點寒峰擁翠嵐，叢臺落日見漳南。
火枯襄子殘銅斗，土蝕平原舊玉簪。
宮閉沙丘空有雀，兵吞函谷已如蠶。
回仙逆旅今存否，世上黃梁夢正酣。

磁州

漳水東流繞碧灣，風蒲獵獵夕陽間。
帽簷不奈黃塵滿，賴有磁州數點山。

銅雀臺

古臺百尺生野蒿昔誰築此當塗高上有三千金步搖
滿陵寒柏圍鳳綃西飛燕子東伯勞塵間泉下路迢迢
龍帳銀筆紫檀槽怨入漳河翻夜濤人生過眼草上露
白骨何由見歌舞獨不念漢家長陵一杯土玉柙珠襦
鎖秋雨

彰德道中

偶逐征鴻過鄴城譙樓鼓角晚連營雨垂魏武分香淚
水湧周文演易聲林慮山高秋靄濕湯陰里近夜燈明

誰人得似韓忠獻鄉社猶誇畫錦榮

美里歌

若有人兮美里玄端兮玉几昔炮烙兮將纍以死今闕
宮兮百世紀望糟丘兮朝歌彼罔有悛兮柰何橫流汙
兮滂沱河有龍兮洛有龜藐余繇兮明夷人弗問兮上
帝臨之帝獨闕兮漳之渚水曾波兮神靈雨已矣乎文
不在茲兮使我心苦

淇州

聯鑣下淇澳烟淡草紛紛綠竹已秋色白旄空暮雲殘
陽孟津渡落葉比干墳尚想鷹揚叟當年此策勳

衛州

衛國多君子郊原景尚雄舟行淇水上人在邶風中酒
不荒商邑琴猶記楚宮孟津在何處無語對征鴻

黃河

按此詩已見卷一
題為出壺城北門

千載金湯擁上流只今惟有荻花秋江南客子笑無語
閒看黃河遠汴州

博浪沙

一擊車中膽氣高
祖龍社稷已驚搖
如何十二金人外
猶有民間鐵未銷

汴梁龍德故基

書來海上勸連兵
已見金輪逐火精
醮絕絳樓無鶴唳
朝空丹宸有狐鳴
羽袍士尚傳三洞
介憤人誰報六更
一代興亡真大夢
陳橋驛畔見青城

登大相國寺資聖閣

大相國閣天下雄天梯縹緲凌虛空三千歌吹燈火上
五百纓縵烟雲中洛汭已掩西墜日漢津空送南飛鴻
闌干倚遍忽歸去颯颯兩鬢生秋風

石假山

晨遊大梁圻涕泗不可忍道間萬雀鬼挿天湧蒼筍尚
想吳震澤巨斧斲嶙峋東南赤子脂已逐枯蘚盡岷岷
神霄君瑤鐘擁鴉關摩挲太古姿在貫右宗稹維國建
宮室天球樹靈箕胡為黑鬚鬢羅此亂蛟蜃事往不必

議陰雨洗殘燐回首丹鳳門古槐葉黃隕

朱仙驛

城郭重來事已非南薰不掩柳依依舊時大慶蒼虬礎
留與田家夜搗衣

鄆陵

鄆陵昔構兵萬騎夜流血一矢忽飛來射落楚山月哀
哉公子側戰骨當速朽胡為三日穀易此半樽酒我今
不飲酒但飲落月光晉楚杳何處雉鳴烟茫茫

上蔡縣驛

上蔡城邊雉兔肥滿川桑棗綠成圍東門牽犬無窮樂
誰遣君侯不早歸

幽贊神明象數開要從混沌見胚胎人間別有著龜在
休問荒城八卦臺

蔡州

君不見蔡州城下三尺雪緋衣小兒二尺鐵汝水鱗鱗
蒼瓠懸不洗逆雛襟上血吏部落筆走風雨穹碑清廟

生民語顓臾乃在邦域中君誅一臣何足詡乾坤萬世
開皇元天戈一指清中原方將泥金泰山頂殘灰豈問

幽蘭軒

蔡州至馬鄉遇大雪有作

北風一夜聲洶洶大地吹如銀浪湧古槐夾道萬玉虬
向人夭矯欲飛動蔡州昔讀昌黎碑疾馳文城見真勇
我今躍馬蹴瑤瓊馬憊長嘶耳雙聳平生凜凜鐵石心
意行萬里無關隴膚爪皴裂豈復問政要歲寒報天寵

回頭却笑鶴髮翁
地爐如蜩縮擁腫

鶴髮翁謂文
趾老使臣也

黃州黃陂驛

晨發定遠驛
千崖紅櫟林
午度大勝關
萬壑青松陰
寒泉瀉澎湃
亂石懸嵌崟
啣啣走野鹿
角角鳴山禽
平生一兩屐
若有山水淫
天台鴈蕩路
坐對清猿吟
竭來擁使節
躍馬聲駸駸
誰知長淮上
風露凝衣襟
黃州渺何處
雪堂蒼烟深
因思蘇長公
幅巾霜滿簪
洞簫起月下
天地皆清音
千載豈云遠
知我猶此心

陽羅堡歌

陽羅殘堡高巘屹亂山勢如秋蛇蟠長江西來五千里
雪濤怒濺秋風寒憶昔王師駐江上旌旗百萬騰龍鸞
江神俛首不敢喘鏡平河碧無驚湍乾坤一統自此始
坐見北極朝衣冠我來蘄黃望夏口彷彿但認烟波竿
漁鼓數聲起何處白鳥飛盡青天寬鰥公盈尺不論價
脩然一笑生清歡興亡往事誰復問磯頭石老蒼苔乾
津鼓急催渡江去又見曉日浮晴巒

黃鶴樓歌

葉葉乎黃鶴之樓兮突起乎天之東南吾不知其幾百
尺兮踞石磴而仰望眩金碧之耿耿手捫星漢如可近
但見天飈吹髮寒鬚鬚瞿唐三峽之波濤洶湧訇擊而
下兮雷聲怒撼于江潭忽遶城以北匯淨若萬頃之清
藍楚山數點鸞騰蛟躍兮碧影倒浸乎烟嵐殘霞似落
未落兮蒲獵獵以風偃柳裊裊以露含武昌亭臺一千
萬瓦光參差浮榭楠下視十二之衢兮炫服士女東西

行者貌蠕蠕之吳蠶黃鶴之仙人霓冠青瑤簪御絳旌
于列缺倒景兮偶見我以大笑欲駐我之征驂攀東溟
之博羅曜折西極之優鉢曇飲我以蒲萄鴨頭之綠兮
侑以洞庭之蒼柑洞庭帝子鼓軒轅之瑟兮舞干戚而
撞宮函白也挾赤鯨以旁睨崔顥怩縮而不敢以談浩
浩乎萬丈之氣兮長虹橫空夭矯而方酣下蟠黃之輿
上斡玄之堪安得挽招搖以酌元氣兮妙太極而函三
慨彼在昔如焚如燠陶司馬之狂悖庾大令之貪恠鸚

鷓之洲何罪而戮赤壁之磯何功而戮吾豈若二三子
斲崑崙之璞兮輕蹈夫太阿之鐔飛來兮黃鶴跨汝從
兮彭聃

鄂渚晚眺

黃鶴樓前木葉黃白雲飛盡雁茫茫櫓聲搖月歸巫峽
燈影隨潮過漢陽庾令有塵汗簡冊福生無土蓋文章
闌干只有當年柳留與行人記武昌

鸚鵡洲

大江東南來孤洲屹枯蘚中有千載人殘骨寄偃蹇貽
漢黨錮禍薦紳半摧殄况復啖葛奴盡使羽翼翦天乎
鸞鳳姿乃此侶狎犬想當落筆時酒酣玉色洗鸚鵡何
足詠僅以雕蟲顯我來策蓬顛清淚悽以泣尚悵迷幾
先不為無道卷賢哉龐德公一犁老襄峴

呂仙亭

昔日呂公遊洞庭玉簫吹裂蘆花汀秋空一劍忽飛去
夜月千山烟冥冥天地茫茫烏兔急波濤洶洶蛟螭腥

起呼老樹欲與語濕露亂洒苔痕青

岳陽樓

洞庭木葉風颭颭雪浪萬頃飛白鷗氣浸中天日月濕
影搖大地山河浮數聲裂玉洞賓魄一點殘黛湘娥愁
安得天瓢酌仙酒跨鯨直上扶桑洲

潭州

百萬人家簇綺羅叢祠無數舞婆婆山盤衡嶽樹林密
水落洞庭鳧雁多染竹痕深湘女淚佩蘭聲斷楚囚歌

洛陽年少胡為者不奈承塵鵬鳥何

瀟湘八景

洞庭秋月

月明水無痕冷光泣清露微風一披拂金影散無數天
地青茫茫白者獨有鷺鷥去月不搖一鏡湛如故

烟寺晚鐘

山深不見寺藤陰鏤修竹忽聞疎鐘聲白雲滿空谷老
僧汲水歸松露墮衣綠鐘殘寺門掩山鳥自爭宿

江天暮雪

長空捲玉花汀洲白浩浩雁影不復見千崕暮如曉漁
翁寒欲歸不記巴陵道坐睡船自流雲深一蓑小

瀟湘夜雨

昭潭黑雲起橘洲風捲沙亂雨灑篷急驚墮檣上鴉黿
鼉互出沒暗浪鳴艣牙漁燈半明滅濕光穿蘆花

平沙落雁

十里黃晶瑩菰蒲暎原隰亂鴻忽何來影墜西風急嘹

唳三數行欲起又飛立水寒夜無人離離爪痕濕

遠浦歸帆

日落牛羊歸渡頭動津鼓烟昏不見人隱隱數聲櫓水
波忽驚搖大魚亂跳舞北風一何勁帆飛過南浦

山市晴嵐

茅屋八九家小橋跨流水市上何所有寒蒲縛江鯉犬
吠樵翁歸家家釜烟起共喜宿雨收霞明亂山紫

漁村返照

雨來湘山昏雨過湘水滿夕陽一縷紅醉眠草茵暖漁
罾曬石上腥風吹不斷野鳧沉更浮沙汀荻芽短

衡州

千里山逢十里平巍樓突兀見澄清州依岫巖屏邊住
人在瀟湘畫裏行海雁飛回秋渚影江豚吹老夜濤聲
何時得似龐居士一鉢空門了此生

永州

燒痕慘澹帶昏鴉數盡寒梅未見花回雁峰南三百里

捕蛇說裏數千家
澄江遶郭聞漁唱
怪石堆庭見吏衙
昔日愚溪何自苦
永州猶未是天涯

湘山寺無量壽佛

大地山河無非佛者
此為真身孰則為假
滔滔清湘
瑶影如瀉
一草一木亦皆瀟洒
月明露寒
綠烟浮野
山禽澗鹿
悉談般若
我來自北
金鞍鐵馬
一笑石上
得清淨捨
巍乎梵宮
朱門碧瓦
彈指毗盧
風斯在下

盤石山

懸崖千仞鐵崔嵬勢似飛虬捲海來我見只疑山欲躍
馬蹄不敢蹴青苔

全州

城郭依稀小畫圖佛光迴照鐵浮屠斑斕歸洞見盤飴
格磔滿林聞鷓鴣

闕

北吞雙練急湘山南聳一螺孤

停鞭欲問炎州事

闕

侏離見矮奴

靈川縣觀桂林山

碧波洗出萬雲鬟

闕

滿殘陽紫翠間三世眼根修得到

天教盡見桂州山

馬王閣

千山萬山紫翠芒
巍閣突起山中央
煜煜金身兜率佛
稜稜鐵面扶風王
烟雲浮動貔虎氣
日月飛遶狻猊光
回望交州渺何處
孤鷲跼跼南海黃

七星山玄元樓棲霞之洞

懸崖插天千尺餘
下有靈穴呀空虚
勢如瑤宮聳渠渠
茁茁浮動金芙蓉
想當未判混沌初
元氣旁魄不得舒

鬼斧鑿裂蒼崎嶇要令吞吐如蟾蜍浩浩大海東南瀦
洪濤蕩激痕未除白乳滴結色雪如伏翼創懸啄瓊琚
滿洞雲烟誰所噓冷翠撲人濕衣裾直疑竅通崑崙墟
十二玉樓鈞天居日華月華佩璫璣天丁夾侍黃金輿
翻然而下騎鯨魚流鈴侶有聲虛徐平生嗜山如獷狙
南窮衡嶽北醫閭數年侍直承明廬章服政爾祠鷄鷓
今朝偶捧紫泥書雕題鵠舌開象胥見山忽覺形遽遽
三世熱惱為之舒手攀古藤倚楫欄天風吹鬢寒蕭疎

山僧留我羹野蔬問我何時返樵漁人生六合一土苴
胡能戚施與遽篠有江可釣田可畲便當箬笠隨春鋤
冠卿何人墮泥淤郡邑鞭背生蟲蛆日之夕矣吾歸歟
欲歸更為山躊躇

題水月洞

鐵崖萬仞鬼斧所鑿長嘯一聲白雲驚躍

自永福縣過八十里山

下山如井上如梯亂石嵯岬割馬蹄正是行人行不得

鷓鴣更在隔林蹄

馬平謁柳侯廟

詞華一代日星尊
茶臼村童儼尚存
山左竟令驅厲鬼
庭中已悔乞天孫
善和里隔生前淚
文惠祠封死後魂
欲奠荔枝不知處
滿池榕葉擁朱門

賓州

賓州大如斗
青林掩蒼靄
亂石熊豹蹲
纍纍漱江瀨
野
嫗碧裙襦聚
虛擁野外青
筠羅米鹽飄
飄雙繡帶
日晚

投古驛酸風不可奈綠竹亂生枝離披影如蓋瘴雨飛
為塵鷓鴣聲噉噉府僚跪庭前對我各一慨濁酒強為
飲旅魂那可醉故園何日還白雲遶吳會

過牂牁江

青草風吹毒霧腥交州何關海溟溟牂牁已恨天涯遠

又過牂牁二十程

過邕州崑崙關

昨日過大林關酸烟毒霧山復山今日過崑崙關寒泉

怒瀉聲潺湲道傍榕樹齊如織
千柯萬葉巖崖間怪藤倒懸
一百尺霜雪不剝皮堅頑勢
如蛟螭夭矯下絕壑駐馬側
視不敢攀

闕

忽何來眼閃電光尾彎彎山童

驚顫髮卓豎勸我急勒金鞍還
因思狄天使貔貅夜度摧狂蠻
上元燈火杳何處至今野燒痕
爛斑我雖一書生袖有青絲綸
誓將報天子肯避路險艱邕州
南征士三萬鐵甲未解寒痲痲
我身七尺不能勇金符正爾羞
蒼顏鐵鞭一揮出關去孔雀飛
下滄江灣

邕州

左江南下一千里中有交州墮鳶水右江西遶特磨來
鱷魚夜吼聲如雷兩江合流抱邕管暮冬氣候三春暖
家家榕樹青不凋桃李亂開野花滿蝮蛇掛屋晚風急
熱霧如湯濺衣濕萬人塚上蛋子眠三公亭下蛟人泣
驛吏煎茶菜蕪濃檳榔口吐猩血紅颯然毛竅汗為雨
病骨似覺收竒功平生所持一忠壯荒嶠何殊玉階上
明年歸泛兩江船會酌清波洗炎瘴

江州在谿洞

司馬琵琶昔日歌天涯流落事如何若行今日江州路
應是青衫淚更多

老母越南垂白髮病妻燕北寄黃昏瘴烟蠻雨交州客
三處相思一夢魂

度三花嶺

絕壁三千丈荒烟八九家黃茅青草瘴黑質白章蛇椒
欖高懸子芭蕉倒吐花嶺頭一回首何處是京華

思明州元日

去年元日步瀛洲
獸舞天墀拜冕旒
山驛今朝一樽酒
微臣身在嶺南州

三雛掌上玉娉婷
拂曉嘔啞語到明
今日亂山孤枕上
耳邊忽似有啼聲

思明州

風吹蠻雨滴芭蕉
杵臼敲殘夜寂寥
留得孤燈床榻畔
思明州裏過元宵

手捧檳榔染蛤灰
峒中婦女趁墟來
蓬頭赤脚無鉛粉
只有風吹錦帶開

鹿酒香濃犬彘肥
黃茅岡上紙錢飛
一聲鼓絕長鎗立
又是蠻巫祭鬼歸

毒蟲舍弩滿汀沙
荒草深眠十丈蛇
遙望天邊紅似火
瘴雲飛落木棉花

刺竹叢叢苦筍生
山禽無數不知名
元宵已似春深後
龍眼花開蛤蚧鳴

度摩雲嶺至思凌州

嵯峨摩雲嶺石壁如梯遠天頂千年毒瘴鬱不消怒入
老楓結丹癭蒼莽思凌州懸厓結屋如蜃樓寨門半掩
刀槩健隱隱雲際聞鳴牛蠻獠下山健如虎口紅如血
面如土手捧柳漿跪馬前山虺水蟲間有俎對此停鞭
空自慨吾獨何為在荒裔他年周京王會圖願借丹青

寫椎髻

祿州遇大風

岩壑驚搖木樹摧滿空苦霧捲塵埃黑風鬼國漂流去
赤縣神州夢寐回病馬不嘶毛似蝟征夫相對面如灰
夜深不解征衣睡況有翻盆急雨來

交趾境丘温縣

九月出薊門北風吹雪衣裘温正月至交趾赤日燒空
汗如水天涯海角茫茫路馬蹄聲裏光陰度萬里長空
一飛絮飄飄知復墮何處夜瞻天極思鬱結臣身南嶠
心北闕願頌聖皇如天福早見塗山班萬玉

二月三日宿丘温驛見新月正在天心衆各驚異

因詩以記之

至元癸巳春二月三日夕陳子使交州弭節丘温驛雲
開林影明出門看月色但見天中間彎彎貼半壁同行
二三子相顧各太息中原月初生去地纔數尺今胡翹
首望月乃在東北神禹奠九州維此實異域玄象尚爾
殊禮義何由識太息不能寐風動松露滴亂星不知名
累累擁南極

交趾支陵驛即事

六轡南驅下寶臺交州正月已青梅富良江湧瘴雲濕
安化橋昏蠻雨來蝙蝠穿林紅似燄蜈蚣浮海黑如堆
防風猶後塗山會終為生靈結禍胎

寶臺交趾山名

交趾朝地驛即事

帝德堯同大山河共一天璽書行萬里銅柱又千年赤
幟明雲際烏衣拜馬前舞階干羽在未必賴樓船

交趾橋市驛戲作藥名詩

長空青茫茫大澤瀉月色使君子何來山椒遠于役虎
狼毒草叢淚如鉛水滴更苦參與商骨肉桂海隔問天
何當歸天南星漢白

入安南以官事未了絕不作詩清明日感事因集

句成十絕奉呈貢父尚書并示世子及諸大夫

篇篇見寒食

拜掃歸來走鈿車杜牧二年寒食住京華胡曾自憐慣識金

蓮燭歐陽修奉使虛隨八月槎杜甫

回首扶桑銅柱標

胡曾

芙蓉帳煖度春宵

白居易

清明寒食

誰家哭

白居易

折戟沉沙鐵未銷

杜牧

關山迢遞古交州

李郢

物換星移幾度秋

王勃

微雨微風寒

食節

裴廷裕

夷歌銅鼓不勝愁

陳羽

殘花悵望近人開

杜甫

不盡長江滾滾來

杜甫

寒食清明都

過了

參寥子

鷓鴣飛上越王臺

李紳

台州地濶海冥冥

杜甫

人踏金鰲背上行

楊蟠

獨在異鄉為

異客

王維

無花無酒過清明

魏野

慈母年高鶴髮垂

石介鄉書無雁到家遲許

渾初過寒食一

百六

白居易

一日思親十二時

山谷

共藉梨花作寒食

東坡

孟光舉案與眉齊

東坡

越裳翡翠無

消息

杜甫

夜合花開日又西

白居易

寒食家家出古城

王建

滿川風雨看潮生

石曼卿

八千里外

飄零客

白居易

起向朱櫻樹下行

張籍

一百五日寒食雨

山谷

風光別我苦吟身

賈島

尚書氣與秋

天香

杜甫

同是天涯淪落人

白居易

海客乘槎上紫氛

李商隱

清明時節雨紛紛

杜牧

虎牙銅柱

皆傾側

杜甫

水盡天南不見雲

李太白

安南即事

聖德天無外，恩光燭海隅。
遂頒南越詔，載命北門儒。
萬里秋持節，千軍夜執戈。
前驅嚴弩矢，後繫擁樵蘇。
睽彼交州域，初為漢氏區。
樓船征既克，徵側叛還誅。
五代頽王紐，諸方裂霸圖。
遂令風氣隔，頓覺版章殊。
丁璉前猖獗，黎桓後覬覦。
一朝陳業構，八葉李宗徂。

安南本漢交州唐立都護府梁貞明中土豪田承美據其地楊廷藝結洪吳昌岌昌文互相爭襲宋乾德初丁公著之子部領立傳子璉璿大將黎桓篡之桓子至忠又為李公蘊所篡公蘊德政日尊乾德楊煥天祚龍翰吳昱凡八傳至宋嘉定乙酉歲陳氏始奪其國陳本閩人有陳京者偽謚文王壻于李直龍翰昏耄不恤政事京與弟本偽謚康王盜國柄吳昱沖幼其子承篡立僭號太上皇死子光炳嗣在宋名威

晁上表內附國朝封為安南王死子日烜立在宋名
日照死今日燭代領其眾於是有國六十九年矣
下俗澆浮甚中華禮樂無諱嫌訛氏阮托制僭稱孤
國諱李字姓李者皆易以阮臨文為字不成以父死
自稱孤子表疏文移及對其羣臣皆然

祭祀宗祊絕婚姻族屬汙

雖有寢廟無歲時祀禮惟供佛最謹國族男女與同
姓為婚互相匹偶以齒不以昭穆今酋之妻其叔興

道女也蓋竊國

闕

懲創而然

尊卑雙跣足老幼一圓顛

民皆徒跣間有躡革履至殿則去之郊迎之際袍笏百人皆跣而已男子悉髡有官則以青巾冪之民悉僧也

陟嶠輕於鹿洄波疾似鳧

足皮厚甚登山如飛芒刺悉無所懼父子男女同川而浴冬夏皆然善水有潛行數百里者

斜鈎青繒帽曲領黑羅襦

巾色深青髻繒為之貫額以鐵線前高一尺而屈之
及頸以帶束反結其後頂有鐵鈎有職掌則加帶于
鈎家居囚首見客乃巾遠行則一人捧巾以從惟首
髻以皂羅包束遠望如道家綸巾而益廣出其旁髮
皆露闕皆衣黑皂衫四裾盤領以羅為之婦人亦
黑衣但白裏廣出就以緣其領博四寸以此為異青
紅黃紫諸色絕無

語笑堂前燕趨踏屋上烏

語音侏離謂天曰勃未地曰烟日曰扶勃未月曰勃

又風曰教雲曰

關

山曰幹隈水曰掠眼曰未口曰皿

父曰吒母曰娜男子曰干女曰于多蓋夫曰重妻曰

陀被好曰領不好曰張領大率類此聲急而浮大似

鳥語趨進輕佻往来如風深黑一色如寒鴉萬點

抵鴉身偃豕羅我背拳狐

其舁人用布一疋長丈餘以圓木二各長五寸挈布

兩端更以繩挈圓木上以大竹貫繩兩人舁之人側
其中若舉羊豕然名曰抵鴉貴者則以錦帛扛用黑
漆上拖黑油紙屋高四尺許銳其脊而廣其簷簷廣
約四尺雨則張之晴則撤屋而用傘筒出入以紅輦
朱屏八人舁之甚麗象背上拖鞍轡凡座名曰羅我
人坐其上拳屈如狐象頷編鈴數十行則琅琅然
寺號千齡陋州名萬劫愚

使者館于太師府左有小刹曰天啓千齡寺前有碑

載建中八年壬辰歲造乃其祖僭號為母李氏追悼
冥福李氏偽謚慈順太后龍翰女也偽興道王陳峻
據萬劫府即唐浪州馬援駐兵浪西里地甚重佛故
州名曰萬劫

笙簫圍醜妓牢醴祀淫巫

嘗宴于其集賢殿男優女倡各十人皆地坐有琵琶
箏第三絃之屬其謳與絃索相和歌則先哩喻而後
詞殿下有踢關上竿杖頭傀儡又有錦袴裸其上體

跳擲號呶婦人赤脚十指爪槎枒起舞醜態百出人家
門首必有小祠其神曰馬夫人刻木象猥惡不可名
狀朔望則陳于庭老稚羅拜之

國尉青盤護軍掬白梃驅

當國二人其叔偽太師陳啟弟偽太尉陳瞻國事巨
細瞻啟皆專之每至殿門下輿則二人各執二大木
圓如鏡色青廣六尺上畫日月北斗二十八宿意以
自障也每州縣有官曰將掬司巡徼之事兼領土兵

有警則盡驅丁壯以往器械悉自備無弓矢惟持

關

亦有操白挺者

閱條親獄訟明字掌機樞

官自司尉而下有檢法明字皆執政官今丁公文杜國器黎克復等為之次有尚書亞卿翰林奉旨判首三司又有閱條則親法令刑獄其族有昭明興道昭懷昭文佐天皆僭王號正月四日椎牛饗其官屬以七月十五日為大節人家相問遺官屬各以一口獻

其首十六日開宴酬之

勃率官中客鬍髻座上奴

奴皆涅其額有曰官中客則官奴也曰座上奴則可
至首左右餘皆白

臺章中贊糾邑賦大僚輸

置御史臺中贊即中丞也刑法酷甚盜及逃亡斫手
足指其人甘心或付象蹴殺之國有大鐘樓民訴事
扣鐘州設安撫通判縣有大僚箕斂煩重魚蝦蔬果

卷二
悉以充斂皆大僚主之

吏榷檳榔稅人收安息租

產檳榔最多其稅亦重專立官榷之安息木取其津
及葉揉為小團大數寸歲收租利甚厚然與西域安
息不類

黃金刑莫贖紫蓋律難踰

民間金銀雖銖兩悉徵送官有私服用者罪死官品
崇卑視傘為差卿相則用三青傘次二傘一傘若紫

傘惟親族用之他人不敢用

安化橋危矣明靈閣岌乎

自館行六十里過安化橋復一里至清化橋北其上
為屋十九間至首所其門曰陽明門上有閣曰朝天
閣左小門曰日新門右小門曰雲會門門內天井廣
深數十丈升自阼階閣下扁曰集賢殿上有大閣曰
明靈閣道右廡至大殿曰德輝殿左門曰同樂門右
門曰橋應門其扁皆金書

曲歌歎時世樂奏入皇都

男子十餘人皆裸上體聯臂頓足環繞而歌久之各行一人舉手則十數人皆舉手垂手亦然其歌有莊周夢蝶白樂天母別子韋生玉簫踏歌浩歌等曲惟歎時世最愴惋然漫不可曉大宴殿上大樂則奏于廡下之後樂器及人皆不見每酌酒則大呼曰樂奏某曲廡下諾而奏之其曲曰降黃龍曰入皇都曰宴瑤池曰一江風音調亦近古但短促耳

龍藥常穿壁蔓藤不離盂

以龍花蕊和安息香油揉為小錠如筋長尺許插壁上
然之終日不絕香甚清馥閩廣人檳榔皆啗乾者以
蔓藤石灰和之交人惟啖軟檳榔取新採嫩者以蔓
葉二寸塗蚬灰裏而食貴者以黃銀榼僮攜之不離
左右終日咀嚼不少休

玳簪穿短髮蟲紐刺頑膚

婦人斷髮留三寸束于頂上

闕

其杪再束如筆無後

鬢髮亦無膏沐環珥之屬富者玳瑁珥餘骨角而已
錙銖金珠無有也人皆文身為鈎連屈之文如古銅
爐鼎款識又有涅字于胸曰義以捐軀形於報國雖
苜子姪亦然

有室皆穿竇無床不尚爐

屋無折架法自棟至簷直峻如傾棟雖至高簷僅四
五尺又有低者故欲黑暗則就地開牕如狗竇然人
用蒲席地坐而向明睡榻之側必有爐熾炭盛暑亦

然以辟濕蒸之氣

星華舟作市花福水為邪

星華府即唐驩州去交州城二百餘里海外諸番舟
航輻輳就舟上為市甚盛酋叔昭文祖廟與其重寶
皆在實大鎮也交州無城壁土牆睥睨而已西有花
福州以水圍遠前有莫橋西陽麻他老邊四橋以通
出入

突兀山分臘汪洋浪注瀘

其國西面皆山惟寄狼寶臺佛跡馬鞍於境內為高

西南善汝縣有赤土山萬仞插天將數百關南柵

江以筏渡行四十里至富良江水湍急不甚闊江之

南名橋市居民頗衆又四十四里曰歸化江一曰瀘

江闊與漠鄂等江自大理西下東南入于海即諸葛

武侯渡瀘之下流也有四津潮汐不常

鼠關林翳密狼塞澗縈紆

丘溫東南行十數里陟岡度嶺西山行兩山間初所

見黃茅修竹既而深林

關

水深不盈尺然周遭百

折或百步一涉或半里一涉凡六七十復度一嶺夾
道皆古木蒼藤有巨石挺出篁竹叢薄最為嶮名老
鼠關西行有山峯秀峙懸亘不絕是為寄狼山翠壁
蒼崖異木翳密鸚鵡孔雀飛鳴互答猿猴無數凡三
十里抵刺竹關下有兵守之關上兩山相交僅通鳥
道大竹皆圍二尺上有芒刺蓋其國控扼之地也
士燮祠將壓高駢塔未蕪

吳士燮蒼梧人兄弟四人一為合浦太守一為九真
一為南海士燮為交趾太守有惠政死葬焉土人祠
之甚厚謹高駢既定交州遂於富良江上橋市之左
立石塔巋然猶存

鐵船波影見銅柱土痕枯

馬援征徼側造鐵船四隻沉于海今水清猶彷彿可
見銅柱援所立也在乾地鋪其刻有云銅柱折交人
滅今陳日烜以土埋之上建伏波祠

墟落多施榻巔崖屢變途

村落有墟每二日一集百貨萃焉五里則建屋三間
四面置榻以為聚墟之所使臣至其國不復行舊徑
皆鑿山開道縈迴跋涉意以示險遠也

千艘商斤鹵四獲粒膏腴

國無儲蓄惟恃舟闕賈販稻歲四斂雖隆冬苗芄芄

然

短短桑苗圃叢叢竹刺衢

桑以椹逐年闕以供蠶每家無牆垣竹籬環之刺竹

大者徑七八寸刺堅如鐵斷而挿之則活

牛蕉垂似劍龍荔綴如珠

芭蕉極大者冬不凋中抽一幹節節有花花重則幹
為所墜結實下垂一穗數十枚長數寸如肥皂去皮
軟爛如綠柿極甘冷一名牛蕉龍荔實如小荔枝味
如龍眼木與葉亦相似一菓古名奇菓有波羅密大
如瓠膚礪砢如佛髻味絕甘人面子肉甘酸核兩目

口鼻皆具又有椰子盧都子餘甘子皆珍味可食

寶箏羅鸚鵡名香屑鷓鴣

鸚鵡螺色紅如雲母形嘴翅似鸚鵡故名香材最多
水沈梅檀亦有之似鷓鴣斑者為貴

揭旌圖鬼像擊柝聚兵徒

旌旗黃黑青紅簇色四脚中畫星官天神或如羅刹
之狀呼集儔類則以大竹截為筒叩之雖遠亦聞
鼻飲如瓠瓠頭飛似轆轤

習以鼻飲如牛然酒或以小管吸之峒民頭有能飛者以兩耳為翼夜飛往海際拾魚蝦而食曉復歸身完如故但頸下有痕如紅線耳

蚶皮為鼓擊蝦鬚作筇扶

蚶蛇大者如合抱之木長稱之腊其皮刮去鱗以鞞鼓面闊數尺但用背皮腹皮不與也向明視之黑質白華章如方勝交人樂以為前列巨蝦大如柱鬚有七八尺長者海濱之人以為拄杖甚佳

家必烹蛇虺人能幻虎羆

山蛇水虺乃其常膳間以充脯醢峒民有妖術誦咒脩煉則幻形為虎搏獐鹿生啗之然不常有也

魚鱗簷梁瓦鵲尾海浮桴

瓦形如板上正方而銳其下之半如古圭然橫半竹以為棧以竹釘釘其瓦于棧上自簷以次相壓至屋脊宛如魚鱗舟輕而長板甚薄尾如鴛鴦之翅兩旁翹起操以三十卒多有至百人者其疾如飛

水弩含沙擲山獾出穴麓

水弩一曰含沙射工以氣射三十步射中其影但覺紅痒即以刀抉去肉不爾必死大率毒蟲毒藥廣以南多有之中州人至此不善寶護必為所害山獾一曰山都多在大木為巢或居巖穴獨足跳躑能眩惑人蓋山鬼水怪類云

鱓魚鳴霹靂蜃氣吐浮屠

鱓魚大者三四丈四足似守宮黃色脩尾口森鋸齒

一名忽雷其聲如霹靂鹿走崖上聞其嗥吼則怖而
墜多為鰐所啗海中大魚多有之惟海鱷最偉小者
亦數千尺吞舟之說非虛也蜃於春夏間吐氣蔽天
如樓臺宮室亦有如七級塔者人往往見之

寓縣傷分阻生靈困毒痛舞階猶未格折簡豈能呼大
社初傳馮轅門合受俘貔貅微偃戢蛇豕偶逃逋天已
殂渠惡民猶奉僭雛勢如純據隴政似皓亡吳鳳札重
宣令狼心更伏辜幸能寬斧鑕猶自戀泥塗獻頌尊天

子騰章遣大夫象鞅言可訂蠹冊事非誣功欲收邊徼
威須仗廟謨沐薰陳此什禮部小臣孚

交趾偽少保國相丁公文以詩餞行因次韻

使星飛下擁祥烟不憚崎嶇路九千雙袖拂開南海
瘴一聲唱破下乘禪妙齡已出終軍上英論高居陸
賈前歸到朝端須為說遠氓日夜祝堯年

一雨隨車洗瘴烟大鵬還擊水三千南來未了維摩病
北渡空思達磨禪使節尋常銅柱外天威咫尺玉階前

臨歧握手無他祝，留取忠貞照暮年。

老鼠關

春風又送使旌還，笑掬清波洗瘴顏。從此定知身不死，生前先過鬼門關。

柳州道中

五嶺炎蒸苦征夫，各憚行荒哉。秦象郡痛矣，柳龍城水毒人多病。烟昏馬易驚，里閭彫瘵甚。邊將莫言兵。

至永州

萬里歸來一葉舟
淡烟疎雨滿汀洲
夢魂怪得清如許
身在瀟湘第一州

浯溪題元次山頌後

羯鼓梨園跡已荒
斯文猶在日星光
我來細拂青苔石
不憶三郎憶湯郎

迴衡山縣望南嶽
呈御史完顏正夫
修撰龐夷簡
雨洗松陰綠未乾
今朝山下倚闌干
一天露重月華濕
七十二峯生翠寒

漠漠寒汀浮芰荷
沉沉幽壑舞蛟鼉
祝融峯頂定有雨
一夜瀟湘烟浪多

回雁峯前一棹孤
平波如鏡浸菰蒲
楚天日落碧雲合
山北山南聞鷓鴣

迴過湘陰縣

牛斗槎邊小客星
北溟萬里渡南溟
三生帶得烟波福
又泛瀟湘過洞庭

泊安慶府呈貢父

共擁旄幢度百蠻今朝忽過皖公山幸承乙夜君王問
更喜丁年奉使還舊夢未迷天祿閣新愁猶憶鬼門關
塵纓笑濯滄浪水少伴沙鷗半日間

采石月題蛾眉亭

昔年李白身翻然袖裏明月飛上天剛風吹度瑤圃前
雪兔跳落千丈泉白今已去八百年明月猶向江中圓
我行萬里擁使旄柳根偶繫東歸船三生似結明月緣
銀光射牖窺我眠夜深忽夢羽衣仙神如碧沼浮疎蓮

脚踏赤鯨跨紫烟問月何在搖玉鞭聳身忽滅鴻翩翩
覺來試鼓朱絲絃起誦國風月出篇開蓬視月月滿川
魚龍吐浪聲濺濺

交州使還感事二首

少年偶此請長纓命落南州一羽輕萬里上林無雁到
三更函谷有鷄鳴金戈影裏丹心苦銅鼓聲中白髮生

享年三十五
已見二毛矣

已幸歸來身復在夢回猶覺瘴魂驚

寶劔金符笑此身灞陵今是舊將軍榻前未上征遼疏

囊底空留諭蜀文七十親闈雙鬢雪八千客路一鞭雲
何時歸棹烟江上閒對沙鷗洗瘴氛

至元壬辰秋九月朔詔命吏部尚書臣梁曾禮部郎
中臣陳孚奉璽書問罪于交趾越翼日召至便殿賜
金符襲衣乘馬弓矢器幣諭遣之明年正月二十有
四日至其國三月望日世子陳日燭遣陪臣明宇陶
子奇奉旨梁文藻等奉表請命以九月至京師行李
之往來及期凡駐偽境五十有二日其山川城邑風

俗為圖一卷諭以順福逆禍為書八篇悉已上於史館茲不敢述姑即道中所得詩一百餘首目之曰交州藁以示同志云癸巳除夕孚敬書



陳剛中詩集卷二